

## Vlada TK: U 2018. nastavljen trend negativnog prirodnog priraštaja



U Akcionom planu Strategije razvoja Tuzlanskog kantona za period 2018-2020. godina planirano je provođenje 48 mjera sa 113 razvojnih projekata, od čega u 17 mjera nisu planirane pojedinačne aktivnosti, te ih se može nazvati općim ili 'samostalnim' što je ukupno 130 razvojnih projekata.

Kontinuirano se provode 82 projekta, završena su za 2018. godinu 52 projekta, a odgođena 22. Ovo je, između ostalog, navedeno u prihvaćenom Izvještaju o razvoju s pregledom implementacije Strategije razvoja Tuzlanskog kantona 2016-2020. godina za 2018. godinu.

Izvještaj sadrži i podatak da je broj poslovnih subjekata u prošloj godini u kantonu iznosio 26.937, što čini 19,2 posto poslovnih subjekata u FBiH, i veći je u odnosu na prethodnu godinu za 499 poslovnih subjekata. Pokrivenost uvoza izvozom iznosi 89,0 posto, što je znatno više u odnosu na pokrivenost uvoza izvozom u FBiH.

Tuzlanski kanton i u 2018. nastavlja decenijski trend negativnog prirodnog priraštaja pa je registrovano 3.767 živorođenih beba, 4.384 umrle osobe i 48 umrle dojenčadi.

Ministrica zdravstva Tuzlanskog kantona Dajana Čolić kazala je da je najniža vrijednost nataliteta registrovana u Sapni, 4,74 promila, a najviša u Gračanici, 10,39 promila.

– Vrijednost stope mortaliteta se kreće od 6,8 promila u Sapni, do 12,21 u Tuzli. Stopa mortaliteta za TK iznosila je 9,85 promila – kazala je Čolić te dodala da stopa prirodnog priraštaja za TK iznosi 1,39 promila.

Naglasila je da su stope prirodnog priraštaja, ali vrlo nepovoljne, registrovane u općinama: Srebrenik, Živinice, Banovići, Kalesija i Gračanica.

Iz prihvaćene Analize zdravstvenog stanja stanovništva Tuzlanskog kantona i indikatora zdravlja u 2018.

godini izdvaja se da su vodeći uzroci umiranja grupe kardiovaskularnih oboljenja, dok su vodeći uzroci obolijevanja akutne infekcije gornjih disajnih puteva, povišeni krvni pritisak, šećerna bolest, te akutni bronhitis.

Vlada TK je dala saglasnost za odobravanje više od 125.000 KM za projekte održivog povratka u Gradu Tuzla i općinama Sapna, Bratunac, Lopare, Modriča i Osmaci.

Ministar za rad, socijalnu politiku i povratak TK Admir Hrustanović smatra da su ta sredstva mizerna te da će ih Vlada TK u narednom periodu povećati kako bi povratnicima dali što veću podršku.

Današnjim zaključkom Vlada je izrazila zabrinutost u vezi sa septembarskom sjednicom Skupštine privrednog društva GIKIL d.o.o. Lukavac, odnosno odlukama koje su donesene na toj Skupštini, čija zakonitost je, rečeno je, upitna.

Ministar privrede TK Asmir Hasić smatra da treba skrenuti pažnju na taj problem kako bi se bolje aktivirao stečajni upravnik, kada je u pitanju zaštita državnog kapitala te da je imenovanje predsjednika Skupštine tog preduzeća nelegalno.

Vlada je dala i saglasnost za upis četiri studenta iz Palestine na Medicinski fakultet Univerziteta u Tuzli u akademskoj 2019./2020. godini. Oni su oslobođeni troškova školarine i troškova participacije, a smještaj i ishrana će im biti osigurani u Studentskom centru Tuzla.

Date: 08-10-2019